

01/01/1997

Sesuaikan cara hidup hadapi era IT: PM (HL)

Manja Ismail

KUALA LUMPUR, Selasa - Rakyat Malaysia diajak memulakan tahun 1997 esok dengan menyesuaikan corak hidup mereka selaras era teknologi maklumat (IT) berikutan langkah kerajaan memperkenalkan Koridor Raya Multimedia (MSC).

Datuk Seri Dr Mahathir, dalam perutusan tahun baru malam ini menegaskan, rakyat tidak mempunyai pilihan kerana zaman maklumat akan memaksa mereka mengubah cara hidup dan cara bekerja.

"Sama ada kita dapat menyesuaikan diri dengan cara baru ini, sama ada kita akan memperolehi kebaikan atau tidak, terpulang kepada kita. Tetapi percayalah, kita sebenarnya tidak mempunyai pilihan.

"Lebih awal kita sesuaikan diri kita, lebih cepat kita pelajari ilmu-ilmu baru ini, lebih baiklah masa depan kita," kata Perdana Menteri dalam ucapannya yang disiarkan secara langsung melalui radio dan televisyen itu.

Dr Mahathir berkata, perubahan corak kehidupan akan bermula dengan penubuhan MSC sebelum ia meluas ke seluruh negara.

Penguasaan teknologi baru dalam era teknologi maklumat akan membantu meningkatkan pendapatan rakyat dan juga pertumbuhan ekonomi negara.

MSC yang ditubuhkan oleh Majlis Kebangsaan Teknologi Maklumat merangkumi kawasan seluas 15 kilometer kali 50 kilometer dari Pusat Bandar Kuala Lumpur hingga ke Lapangan Terbang Antarabangsa Sepang.

Turut dibangunkan dalam koridor itu ialah Bandar Putrajaya dan 'Bandar Cyber' yang akan dilengkapi dengan segala infrastruktur komunikasi supaya segala urusan boleh dibuat melalui multimedia; iaitu suara, gambar, data dan semua maklumat lain.

Dengan itu kegunaan surat-menyurat dan wang tunai akan dapat dikurangkan.

Sebaliknya, urusan hidup seharian, pentadbiran Kerajaan dan urusan niaga dapat dibuat melalui komputer. Demikian juga industri akan menggunakan komputer yang boleh menghubungi seluruh dunia.

"Inilah corak kehidupan yang akan diperkenalkan mula-mula di MSC dan kemudian ke seluruh negara. Ini bermakna cara hidup kita akan bertukar," kata Dr Mahathir.

Perdana Menteri berkata, walaupun kerajaan sedar masalah yang akan dihadapi oleh pekerja negara ini, jika sanggup mempelajari dengan bersungguh-sungguh, mereka mampu dapat menguasai teknologi baru ini.

Beliau bagaimanapun mengingatkan, dalam menuju ke arah zaman maklumat dan kemajuan yang diharapkan, rakyat tidak boleh lupa pentingnya negara terus aman dan stabil.

Perpaduan di kalangan rakyat berbilang kaum mestilah diteruskan. Dasar-dasar negara yang menitikberatkan agihan kekayaan ekonomi secara sama rata, keadilan serta pegangan kepada nilai-nilai murni mestilah dijayakan dengan kerjasama semua pihak.

"Dengan menghurai zaman teknologi maklumat dan apa yang sedang kita rancang untuk menangani perubahan ini, apakah kita sudah lupa akan kemiskinan yang masih ada di kalangan kita?"

"Untuk menjawab soalan ini kita patut bertanya apakah ketika kita ghairah dengan membina bangunan pencakar langit dan menara, lebuh raya ekspres, bandar mewah dan lain-lain, kita pernah mengurangkan usaha kita untuk membasmi kemiskinan?"

"Tidakkah kita berjaya mengurangkan kemiskinan daripada lebih 40 peratus kepada 15 peratus? Tidakkah kita wujudkan peluang kerja begitu banyak sehingga kita terpaksa menerima pekerja asing? Bolehkah kita tunggu

sehingga kemiskinan hapus sama sekali sebelum kita mengindahkan bandar-bandar kita, membersihkan longkang-longkang dan menanam pokok-pokok bunga?

"Justeru itu, apakah kita perlu tunggu hingga kemiskinan dihapuskan sama sekali sebelum kita gunakan peluang zaman maklumat untuk membangunkan lagi negara kita, melegakan kesesakan lalu lintas di Kuala Lumpur dengan memindah pusat pentadbiran, membina lapangan terbang baru dan lebuh raya?

"Kita bukan membina patung untuk memperingati diri kita, bahkan kita tidak pun menamakan tempat-tempat tertentu dengan nama pemimpin tertentu.

Perdana Menteri menyifatkan 1996 sebagai tahun bersejarah bagi Malaysia dengan beberapa peristiwa yang membanggakan termasuk pelancaran Rancangan Malaysia Ketujuh (RM-7), MSC dan Pelan Induk Perindustrian.

(END)